



SIARAN AKHBAR PRESS STATEMENT

S.A. 2015/03/30 (HQ)

TNB BELANJA RM273 JUTA PERKUKUHKAN INFRASTRUKTUR ELEKTRIK DI NEGERI PERAK

Tenaga Nasional Berhad (TNB) memperuntukkan perbelanjaan modal sebanyak RM273 juta pada Tahun Kewangan berakhir 31 Ogos 2015, bagi membantu Kerajaan Negeri Perak mempertingkatkan dan memperkukuhkan pelaburan di negeri tersebut.

Pengurus Besar Negeri (Perak), Bahagian Pembahagian TNB, Dato' Haji Mohd. Zahir bin Haji Md. Nagor berkata perbelanjaan tersebut adalah bagi menyediakan infrastruktur dan rangkaian kabel serta pencawang-pencawang dalam memastikan bekalan elektrik adalah sentiasa pada tahap berdaya harap yang tinggi di negeri ini.

"Sebanyak RM55.5 juta daripada jumlah tersebut diperuntukkan bagi memperkukuhkan sistem bekalan elektrik di Daerah Batang Padang. TNB sentiasa mengambil kira perancangan pembangunan oleh Kerajaan Negeri dan akan terus meningkatkan prestasi pembekalan elektrik agar boleh berdaya saing untuk menarik para pelabur asing ke negeri ini," kata Dato' Zahir.

Tambah Dato' Zahir lagi, dalam tempoh lima tahun sejak tahun 2010 sehingga 2014, TNB telah membelanjakan sebanyak RM326.4 juta bagi melaksanakan 1,116 projek untuk meningkatkan infrastruktur elektrik di Negeri Perak. Antara bidang kerja yang dilaksanakan termasuklah penggantian pemasangan pencawang yang usang seperti alat ubah, alat suis dan 'Vacuum Circuit Breaker' (VCB) serta konfigurasi kabel kepada Pencawang Pembahagian Utama (PPU) dan Pencawang Masuk Utama (PMU) baru atau sedia ada.

Turut hadir, Pengerusi Jawatankuasa Hal Ehwal Pengguna, Sumber Manusia, dan Masyarakat Sivil (NGO), YB Dato' Haji Samsudin bin Haji Abu Hassan merangkap ADUN Air Kuning; Ketua Kawasan, Suruhanjaya Tenaga Negeri Perak, Haji Nur Ali Za bin Omar dan Yang Dipertua Majlis Daerah Batang Padang, Haji Razali bin Bakar.

Di majlis tersebut, TNB turut menyampaikan sumbangan berupa lima unit 'Vacuum Cleaner' dan lima unit 'Water Dispenser' kepada lima buah masjid/surau, dan lima unit 'Water Dispenser' kepada lima buah sekolah di Daerah Batang Padang, dan satu lagi 'Water Dispenser' untuk kegunaan Pusat Khidmat DUN Air Kuning.

Program Bersama Komuniti, dahulunya dikenali sebagai Program Bersama Pemimpin Komuniti mula dilaksanakan pada tahun 2005. Ia menjadi platform kepada TNB untuk berkongsi maklumat dan perkembangan terkini operasi hariannya dan berdialog secara terbuka dengan matlamat memperbaiki mutu perkhidmatannya kepada masyarakat.

Dikeluarkan di Tapah, Perak pada 12 Mac 2015

Untuk pertanyaan lanjut, sila hubungi Md Derus Bunchit (019-266 2296) /
Teng Yoon Soon (019-29312280) / Maizatul Nadiah Saadon (017-381 6602)
media@tnb.com.my